

2 PITA

Pita so mamey meyki ko hok non

Meyamey uwr hokwe: Aposel Pita.

Yier hiy ma lwayr meyamey hokwe: Hiykwe yier Rom mon lwak non po meyamey pak e, nonkway lwak popriy pey.

Enekwei hiy ma meyamey hokwe: Hiykwe enekwei Yia 66 sok meyamey, Jisas hiy ma lokrue so meyki.

Ok mamey mon ma lwak mokwe senkin: Mamey okukwe Pita hiykwe enekwei hiy kiy-nuw-okrue ohriar sok meyamey. Hiykwe sehe meyamey, payhokuaw, hiykwe senkin lira, low sios mo owh mon ma lousne somokwe, ya senkin-aw lwak kok a, hiy lokrue okriy hain seyn. Pita hiykwe kristen me seme me-kraipakrai, God so ok ke nakruok kraipakrai e, payhokuaw God so ok kokwe, ok-arar, okpey, uwrsa homkiaw ma mesor me hieyn korey. Hyo ok pariawey kokwe hiykwe senkin me, “Ki ohiy so lwayr yor ke peie nan koukou-ay o, payhokuaw ki ohokwe senkinaw lwayr peyow peyow ey korey, sawk enekwei pariawey-ar sok ya mon piapay a.”

Mamey 2 Pita ko uron ipey-ar hokwe senkin: Pita hiykwe senkin lira, ki erey mon kokwe, low, kristen me mon piapay ey hom lwak, seyr lira way yor piap-araw kristen me mon makuayk sakuayk ey hom lwak. Hiykwe sawk kristen me seme me-kraipakrai, hmo liwak yor mokwe yaprue lwak e, seyr low, hme ma mon yorpayor seme lorok kraipakrai e, seyr Jisas so ma-le enekwei se-aw lorok kraipakrai naruok e.

1 ¹Hakwe Saimon Pita, Jisas Krai so mey-uwr, seyr aposel. Mamey okukwe hakwe uwrsa, hromo God, seyr hromo Huonok-prosue-uwr Jisas Krai so yor luwluw-aw ko kueur nonaw, hromo nan kiykiy-ay yor ihey-ar ke hieyn ke ma lonok me mey kow.

²Maym kow yor o, liwak marowhway yor o, somokwe God o, hromo Hakamay Jisas o, hom hehe ma nonkway so kueur nonaw, hmo mon ka nuw-wak prupru-sow.

God hiy hreme ma lahan iaup me-huonok hiy non

³Jisas hiykwe God so kraih non. Sa kraih sohy so kueir nonaw kokwe, hiykwe hremekwe kyai lowpwarowp, hromo liwak yor, God se ma nan wayr me hiy-mon ey me po kow. Hromkwe kyai sohom non seme lwak, payhokuaw, hromkwe Jisas se nonkway, hiykwe uwr hreme hyo panpaniowni o, hyo yor yaprue o, sohom non-aw ma me-huonokyaw hiy non. ⁴Yerki sohy nonaw kokwe hiykwe hremekwe kyai ihey-ar, seyr ipey-ar ma nuw-wak hreme ma me-loray me po kow, hrom kyai sohom mo kueir nonaw ki ohiy so lira way yor piap-araw hreme mon piapay ey me hakan sakan e, seyr God hiy penkin lwak e, senkin non-wawwaw wak e.

⁵Sohiy so hokuaw kokwe, homkwe hmo nan kiykiy-ay yor me yor yaprue non nak-meio peykyay e kwa nuw-nakrion-say, seyr hmo yor yaprue mokwe, nonkway ke kwa nak-meio peykyay. ⁶Seyr nonkway mon kokwe, hunkiw-ayay lanok anak yor ke kwa nak-meio peykyay, seyr hunkiw-ayay lanok anak yor mon kokwe, lorok kraiy wayr yor ke kwa nak-meio peykyay, seyr lorok kraiy wayr yor mon kokwe, God se nan wayr yor ke kwa nak-meio peykyay.^a ⁷Seyr God se nan wayr yor mon kokwe, wayh-wayh me uron lowk ke kwa nak-meio peykyay, seyr wayh-wayh me uron lowk yor mon kokwe, uron-pi ko-ar yor ke kwa nak-meio peykyay. ⁸Payhokuaw, hunkwe kyai yaprue sohom non lwak ankin, seyr hno mon kraiar lwak ankin, hwon hromo Hakamay Jisas Kraih se ma nonkway hokwe, hunkwe kraih, mey meio ey non lwak ey, seyr hno mey mokwe ayay leip lopa liy lwak ley. ⁹Sawk uwr, kyai yaprue senkin lopa posokwaw lwak e, hiykwe lira nyan-nyan, seyr kopyo lwak. Seyr God hiy hye hyo yor piap-araw paraw-uh ko se ma hawr mnow-mnow kow hokwe, hiykwe po lorionay.

¹⁰Hano wayh om, God hiy hme ma me-huonokyaw o, hme ma lahan iaup o, hmo mon-aw senkinaw kwa nuw-meio hrekaw hrekaw sakon kaw. Hom senkin lon ankin, hmo nan kiykiy-ay yor mokwe makuayk sakuayk lopa, ¹¹seyr hme hromo Hakamay, seyr Huonok-prosue-uwr Jisas Kraih so Wayr-hre-peyow-peyow-yier mon kokwe, kar aiopey hay non nak-me-huonok yawriy huon ey.

¹²Ok-ar-ok, hom ma lonok somokwe, mo hom nonkway hi, mo hom yaprue lorok kraipakraih hi, hakwe hme senkin-aw ma-me nanpanan wayr ey. ¹³Hakwe senkin nan, ha ki erey su lwayr nonaw ma lwak ohokwe, ha hme ma-me sasia nanpanan wayr ohokwe, yaprue-ar. ¹⁴Payhokuaw, hakwe senkin nonkway, hano enekwei ki ehe lokriy hain ey hokwe, pau ohriar lwak. Hromo Hakamay Jisas Kraih hiykwe hanekwe papo mekow

^a 1:6 Ga 5:22-23

kumay.^b ¹⁵Hakwe hano kra i lowpwarowp non sehe nuw-nakrion-say ey, sa hano lokrue so meyki hokwe, homkwe ok seme senkin-awaw nanpanan wayr yerki non liy lwak.

Unsaney Krai so panpaniowni se ma lira hom non

¹⁶Enekwei hrom hme Hakamay so kra i o, seyr hiy ma-le ey o, seme ma mesor kow mokwe, hromkwe ok-pey, uwr sa homkiaw puraw ma nanpanan ohruw-a me ma-sahre mesor pa. Sawk hiy seirpey-ar ma lwak hokwe, hromkwe hromo nene arian non lira.^c ¹⁷Enekwei Aio God hiy hye uru ayaw-ar, seyr panpaniowni, seme ma kow o, seyr wouk-ok kamon Panpaniowni Seirpey-ar ko hye senkin ma me o, “Ohokwe hano Ney, ha uron-pi ko-ar ma lwak hiy non, hakwe hye kar nuw-ey,” hromkwe mo serey siraw non-wak. ¹⁸Wouk-ok nonkumey ko ke ma le sokukwe, hromkwe hromkiaw lonuayk, hrom hye nion mnuw pekneyweys mon non-wak non.^d

¹⁹Sa hromkwe senkin seme nuw-nonkway popriy, ok, profet hom ma mey hain mokwe, okar-ar. Sei, homkwe profet mo ok somokwe, ohriar kwa nuw-iwak ira kraipakrai popriy, hom lam kamon hiy eym-nawp mon ma lyar se ma nuw-iwak ira kraipakrai popriy se hieyn. Homkwe senkinaw-aw kwa nuw-iwak ira kraipakrai popriy, senkinaw-aw, ey hiy nuw-onkampru yar, seyr napuar leisnon ko hiy hmo uron mon kanak-kaie sehe. ²⁰Ok lowpwarowp mo eir mon kokwe, homkwe senkin kwa nonkway popriy, profet-ok mamey porih mon ma lwak mokwe, profet homkwe hmo uron arian ko me mey pa. ²¹Payhokuaw, profet-ok mokwe, uwr mo uron arian ko me lousne sa-ousne pa. Sawk uwr sa homkwe ok, God so mon ma le me mesor, Niohney Pekneyweys hiy ma hiy-anok anak senkin.^e

Okrei-ok me hiymon sorasor uwr hom non

2 ¹Paraw kokwe okrei-profet homkwe uwr sa mo ompok mon lousne-sa-ousne. Seyr liy-liy-aw, enekwei enkin ohokwe, okrei-ok me hiymon-sorasor-uwr homkwe hmo ompok mon ya lousne-sa-ousne a. Uwr somokwe, okrei-ok, uwr sa mo nan kiykiy-ay yor me mon piapay ey me ouon-aw hiymon sorasor ey, seyr Hakamay Seirpey hme ma hrsarsay preisia ha se me-meyamey ey. Hom senkin lon ankin, suw hme nian mon piapay yor ke saw-mon ousne.^f ²Uwr sa kraiar homkwe hiymon-sorasor-uwr sohom mo owh-mar weynpaweyn piap-araw me pyay ey, seyr hom senkin ma lon me hokuaw, uwr sa kraiar homkwe God so ok-ar-ok ko yerki se me-piap-ma-piap ey. ³Okrei hiymon-sorasor-uwr somokwe okpey

^b 1:14 2 Ko 5:1; Jon 21:18-19 ^c 1:16 Mat 17:1-5 ^d 1:18 Mat 17:5 ^e 1:21 2 Ti 3:16; 1 Pi 1:11-12 ^f 2:1 Mat 24:11; Ju 4

senkin senkin homkiaw ma nanpanan ousne sa-ousne nonaw, omeme kristen hom ma nak-wak me me-warei-arei onokyaw ey. Uwr, okrei-uwr seme mesor anon anon ey hiykwe enekwei meipey hay po naruok koruay, seyr Uwr okrei-uwr seme mon piapay ey hiykwe inaw liwak ira.

⁴God hiykwe ensel, weynpaweyn piap me ma meio mokwe, hyo aw-mar ke mesair kow lopa lwak pa. Sawk hiykwe hmekwe yier piap-araw ya non mon lway swakreik. Hme kokwe God so mesor anon anon enekwei se naruok e, ki-eyh eym-nawp non mon po piynay swakreik.^g ⁵God hiykwe uwrso paraw-uh ko, Noa so enekwei sok ki mon ma lwayr mokwe, hyo aw-mar ke mesair kow lopa, lwak pa. Sawk hiykwe hu se me ohuwn, uwrso yor piap-araw ma mon seme lohuwn away e. Sa uwrso hiy ma me-huonokyaw prosue mokwe, Noa, uwr yor luw-luw-aw me ma mesor o, uwrso iha sirom mu nareysyar o.^h ⁶Paraw God hiy yier Sodom, Gomora leys se heyn-non-ok ma me hokwe, hiykwe hmekwe ya non sasow oum-pru kawk lowpway. Yier somokwe hiykwe uwrso hye ma nanpanan lopa me owhnan ke hieyn mon ousne, hme omok senkin lon ey me mesair kow.ⁱ ⁷seyr hiykwe Lot, uwr luw-luw-aw se huonok prosue. Lot so uron hokwe, uwrso God so sow me ma kamaun sow mo yor orki non hom nuw-mon hei.^j ⁸Payhokuaw, uwr luw-luw-aw sohokwe, uwrso sohom mo ompok mon lwayr. Enekwei enekwei, uwrso sohom mo God se kamaun sow yor hiy ma lira o, ma lonuayk o, hyo wa luw-luw-aw se aw aiopey hay nuw-mon nak-ok. ⁹Paraw senkin lwak ankin, suw senkin mesair kow, Hakamay hiykwe yerki, uwrso God se ma nanpanan me hmo leykawn ko me kahya prosue ey hokwe nonkway. Seyr hiykwe yerki, uwrso luw-luw-aw ma lwak lopa me lomniy mamniy naruok wayr ey hokwe nonkway, senkinaw-aw, hme mesor anon anon enekwei hiy nuw-ousne. ¹⁰Hakamay hiykwe uwrso, lira way yor piap-araw ki ko me ma pyay, seyr God so hiy-wayr krai se ma me-puar mokwe, ipey-ar nuw-ira mesor anon anon ey.

Okrei hiymon-sorasor-uwr somokwe seyn hok pey, seyr aryar yor non. Homkwe ompay nonkumey ko inaw ma lwak me mon komnow komnow yor lopa me me-piappapiap.^k ¹¹Mo ensel nonkumey ko mo krai o, seyr hom seirpey ma lwak o, okrei hiymon-sorasor-uwr sohom mo eir mon lwak hi, homkwe Hakamay so inour mon kokwe ompay, nonkumey ko inaw ma lwak me^l ok-piap-ok liy me ley.^m ¹²Sawk uwrso somokwe yor, hom ma nonkway lopa me me-piappapiap. Homkwe ay weywar awya-pey-ar me hieyn, seyr homkwe hmo uron arian homkiaw

^g 2:4 Ju 6 ^h 2:5 Stt 6:1–8:22; 2 Pi 3:6 ⁱ 2:6 Stt 19:24; Ju 7 ^j 2:7 Stt 19:1-16 ^k 2:10 Ju 8,16 ^l 2:11 Baibel nonkway-uwr har homkwe senkin nan, meyk hokwe senkin: Ensel homkwe okrei-tisa me ok-piap-ok liy me ley. ^m 2:11 Ju 9

ma nanpanan me pyay meio. Hmekwe sakreik mon piapay e mow-yay sowkriy, seyr hmekwe ay weywar me hieyn lira por ha ey.ⁿ

¹³Uwrsa sohom, uwrsa har me aw ma mon ok mokwe, hmekwe seyr aw ya ma-sahre mon ok a. Uwrsa sohom mo kar ley yor kokwe, heyow-ok piap-araw me inopuaw ma lon-nakyas yor hok non. Uwrsa sohom hme nion non-iwak sir a mokwe, hmo okrei-ok lokin lor-a-lor yor ke ma nan koukou-ay nonaw, sios so swa-hokruw-a yor ke moryak aiopey hay piap non mon or-pa-or seipasei kow. ¹⁴Hmo nene mokwe yokun nweyh kane yor hokwaw nuw-wak prusow, homkwe yor piap-araw seyn mon kane kane pey. Homkwe uwrsa nompow ma lwak me naw-pway mon hiy-yawriy-sawriy, seyr homkwe ompreir kaw kow yor ko nonkway uwr-ar. Homkwe God so hruo-yay kow ok ouon mon lwak. ¹⁵Uwr somokwe yerki luw-luw-aw se po lokriy hain, yerki piap-araw Beor so ney Balam hiy ma lanio se pyay e. Uwr sohokwe mein-owon, hyo mey piap-araw non ma meio lonok me uron-pi ko-ar nuw-wak.^o ¹⁶Saw k Balam sokwe donki, ay, woki-ok lopa hiy uwrsa mo wouk-ok non me-hripahri me-sous, sa Balam so lawk-lawk yor ke sehe mon sakawk.^p

¹⁷Uwrsa somokwe ki-saw-hu ma lia sonsonay me hieyn, seyr waw, sueyr howniy aiopey hay hok ma lway nakey me hieyn. God hiykwe uwrsa senkin me kokwe yop eym-nawp krwere krwere mon po me-iaup kow koruay naruok.^q ¹⁸Uwr somokwe nak-aryar, seyr lawk-lawk-ok me lohruw-a. Seyr homkwe uwr ki ko mo lira way yor piap-araw nonaw kristen iwon, uwrsa, yor piap-araw me ma mon nakyas wayr me ma kiy-okriy hain me leykawn kuayk sakuayk. ¹⁹Okrei hiymon-sorasor-uwr somokwe, kristen iwon seme uwrsa ma hrsay preisia hrahra ha me hieyn mon wak e me-loray. Sawk homkiaw kokwe, yor piap-araw hme nian ma mon piapay mo mey-uwr puraw lwak. Payhokuaw, unsaney yor piap-araw penkin hok swakakar e, hiykwe yor piap-araw sohok ko mey-uwr puraw lwak. ²⁰Uwrsa, hromo Huonokyaw-prosue-uwr, Hakamay Jisas Krai se ma nonkway se hokuaw yor piap-araw ki ko me hakan ankin, sawk yor piap-araw somokwe hme ma-mon akre-akre makuayk ankin, uwrsa senkin somokwe piap-araw-ar nuw-wak. Enekwei enkin hom piap ma ma-lwak omokwe, paraw hom piap ma lwak so eir mon lwak.^r ²¹Uwr prueyn yerki luw-luw-aw se ma nonkway lopa hiykwe, heyn aiopey hay lopa. Sawk uwr prueyn yerki luw-luw-aw se ma nonkway hiykwe, meyki ma-kankoum sow hain ankin, sohokwe piap-araw-arar. Payhokuaw, mo hiy yerki luw-luw-aw ihey-ar se nonkway hi, hiykwe God so me-kupaku-ok pekneyweys hye ma mesor kow me po sasow hain.^s ²²Weynpaweyn uwrsa seme ma lousne mokwe, senkin mesair kow, ok

ⁿ 2:12 Ju 10 ^o 2:15 Nam 22:7; Ju 11; MHO 2:14 ^p 2:16 Nam 22:28-35 ^q 2:17 Ju 12-13
^r 2:20 Mat 12:45 ^s 2:21 Luk 12:47-48

uwr̄sa lowpwarowp ma nonkway omokwe, okar-ar: “Nwoh hiykwe wouk hiykiaw ma le say hain me ma-le y a,” seyr, “Huok, hu ma hawr kow hiykwe peis mon ma-le y swasei seipasei.” *Snd 26:11*

Hakamay hiy ma-le ey se ma me-loray hiy non

3 ¹Hano wayh ihey-ar om, hano mamey hme ma kiy-mey kow ha okukwe, hano mamey meyki ko hok non. Mamey ireysyar ha hme ma me y kow sokukwe, hom uron mnow-mnow-aw nonaw nanpanan e mon ie-ie. ²Hakwe profet pekney-weys mo ok, paraw-ar ma mesor o, seyr hromo Hakamay Huonokyaw-prosue-uwr so me-kupaku-ok, aposel hom hme ma kow o, seme hme ma-hiymon nanpanan.^t

³Peyr homkwe senkin kwa nonkway pie, enekwei pariawey omokwe lourde-uwr̄sa hmo lira way yor piap-araw arian me ma pyay homkwe ya lousne sa-ousne a. Homkwe hme lourde ey,^u ⁴seyr senkin mesopok ey, “Hai, Hakamay poho? Hiy ma-le e ma me-loray hokwe, poho? Hromo aio-om homkwe po laway, sawk omeme lowpwarowp mokwe ki se ma monhre pie so liy-liy-aw nuw-wak.”^v ⁵Uwr somokwe okar kamon okwe lorionay arian me lorionay. Paraw kokwe nonkumey homkwe, God so ok ko kueir nonaw lousne sa-ousne, seyr ki hokwe hu se monhre, seyr hu non monhre.^w ⁶Seyr ki paraw-uh ma monhre pie hokwe, hu so kueir nonaw mon piapay, hu kwaresi ma lohuwn non.^x ⁷Sawk pokon ohiy so nonkumey o, ki o, God so ok sohokwaw nakruok kow naruok, omok, God so lira mesor anon enekwei sok ya non loum-pru kaw lowpway ey se. Seyr enekwei sohokwe uwr̄sa, God se ma nan lopa me nak-ira mesor anon ey, seyr mon piapay ey.

⁸Hano wayh ihey-ar om, homkwe ok kamon okwe peie lorionay o: Hakamay se kokwe 1000 yia o, eypok kamon o, irweyk korey. Enekwei kreysyar sohokwe hye kokwe liy-liy-aw.^y ⁹Hakamay hiykwe hyo me-loray-ok me mon ousne ey hokwe, seyn lokunpakun pey, uwr̄sa har hom ma nan senkin. Hiykwe hne kokwe meinkiowp-aw naruok wayr, payhokuaw, hiykwe uwr̄ prueyn sa prueyn lira por ha e mon pey, sawk hiykwe uwr̄sa lowpwarowp hom hmo uron me kankoum e mon.^z

¹⁰Sawk Hakamay so ma-le enekwei hokwe, yokun-uwr̄ se hieyn le ey. Nonkumey homkwe, oksa aiopey hay non nak-ira por ha ey, seyr nonkumey mo ompay ompay mokwe ya hok loumpru kaw lowpway ey. Seyr ki o, omeme lowpwarowp ki mon ma lwak o, somokwe lira por ha ey.^a

¹¹Omeme lowpwarowp mokwe omok senkin mon piapay ankin, hai, hom lowpwarowp kokwe, uwr̄sa penkin lwak e? Hmo liwak yor mokwe

^t 3:2 Ju 17 ^u 3:3 1 Ti 4:1; Ju 18 ^v 3:4 Mat 24:48 ^w 3:5 Stt 1:6-9 ^x 3:6 Stt 7:11; 2 Pi 2:5 ^y 3:8 Sng 90:4 ^z 3:9 Hab 2:3; 1 Ti 2:4 ^a 3:10 Luk 12:39; 1 Te 5:2

pekney-weys ka lwak, seyr God se-aw kwa nanpanan, ¹²hom God so Enekwei se ma naruok ira huon omokwe, seyr hyo ma-le enekwei hiy saw-ousne e ma isar isar ohokwe. Enekwei sohokwe, nonkumey mokwe ya hok loum-pru kaw k ey, seyr hmo ompay ompay mokwe, ya-li hok loum omyow omyow ey. ¹³Saw k hromkwe God hiy hreme pay me me-loray e, seme naruok. Hiykwe hremekwe nonkumey iwon o, ki iwon o, seme me-loray. Somokwe yor luw-luw-aw ko yier.^b

¹⁴Sohiy so hokuaw kokwe hano wayh ihey-ar om, hom enekwei sehe ma naruok ira huon omokwe, homkwe God so inour mon mnow-mnow-aw, seyr heyn lopa, seyr hye nion aymarowh-aw lwak e kwa nuw-nakrion say. ¹⁵Homkwe senkin nonkway e, Hakamay hiykwe meinkiw-p-aw sehe naruok wayr, uwr sa lowpwarowp me ma-me-huonokyaw prosue e, hromo wayh ihey-ar Pol hiy hme mawkhaw ihey-ar, God hiy hye ma kow non ma mey kow ha senkin.^c ¹⁶Hyo mamey lowpwarowp, ok seme ma lohruw-a mokwe, hiykwe yerki liy-liy-aw nonaw mey. Ok har hyo mamey mon ma lwak mokwe, honon honon, liy nonkway popriy ley. Ok somokwe uwr sa nonkway lopa, seyr ma lowk-la-pa-la hom irweyk eyn ma ka-hre me-sorasor hom non, hom ok har, God so mamey porih mon ma lwak me ma ka-hre me-sorasor senkin. Hom senkin ma lon somokwe, homkiaw-ayay mon piapay.

¹⁷Hano wayh ihey-ar om, hom ok seme ma nonkway me hokuaw kokwe, homkwe iray-iray non seme nak-wak e, sawk sow me kamaun sow uwr sa hom hme senaw mon anyan swakreik ha, maw-om hom ma lwayr ihey ko me.^d ¹⁸Saw k homkwe hromo Hakamay, seyr Huonok-prosue-uwr Jisas Krai so maym o, nonkway o, sohom non senkinaw-aw kwa leyw wayr. Panpaniowni hokwe, pokon o, omok o, hyo mon-aw ka nuw-wak peyow peyow.

^b 3:13 Ais 65:17; 66:22; MHO 21:1,27 ^c 3:15 Ro 2:4 ^d 3:17 Mak 13:33; 1 Ko 10:12